

2. Nagari Alame Geluwa



Addaameranne iya machera Xoossay entaw giigisida daro lo77iya atakilte bessan, daro ufayttidi de7oosona. Entaw ma77iya afili baawa; nagari buroo alamae geliboonna gisho, kalloy enta yeellayena woy borssena. Entti atakilte bessan Xoossara simerettoosona; iyara odettoosona.



Gidoshin, issi gene shooshi atakilte bessan de7ees. He shooshay maccasiw, "Tuma Xoossay hinttena atakilte bessan de7iya mitha ubbaa ayfiyappe moopite gidi kiitide?" yaagidi oychis.



Maccasiya zaarada, "Xoossay atakilte bessan de7iya mitha ayfiyappe mite, shin iitanne lo77o ersiya mithaa ayfiyappe moopite. Hintte he mithaa ayfiyappe miikko woy iya bochiko hayqqana" yaagis.



Shooshay zaaridi maccasekko, "Hessi worddo! Hintte hayqeketa. Xoossay hessa giday, he mithaa ayfiya hintte miikko akeeka demmidi lo77onne iitaa Xoossaada eranaysa I, eriya gishosa" yaagis.



Maccasiya mithaa ayfey maanaw mal7o, be7anaw lo77onne, cinccatethi demmanaw amoyaba gididaysa be7asu. He mitha ayfiyappe ekkada masu; ba azinaska iyappe immasu; ikka mis.



Qoppona de7ishin, entta ayfey dooyettin, entti xire kallo de7eysa erdosona. Entti mitha haythi sikkidi bantta kalluwa kammanaw koydosona.



Addameynne iya machiya, Xoossay atakiltte bessan hemetishin iya girsaa si7idosona. Entti Xoossafe qosettidosona. Shin Xoossay iya xegidi, "Addaame, awun de7ay?" yaagidi oychis. Addaamey zaarid, "Atakiltte bessaa gidдон ne girsaa si7ada, taani kallo de7iya gisho, yashetida qosettas" yaagis.



Xoossay, "Neeni kallo gideysa new odiday oone? Taani nena mooppa gida mithaa ayfiyappe madiye?" yaagidi oychchis. Addaamey zaaridi, "Taara daana mela neeni immida macasiya mithaa ayfiyappe taw immin mas" yaagis. Xoossay maccasiw, "Neeni hessa ays oothadi?" yaagidi oychchis. Maccasiya zaarada, "Tana shooshay cimmiis" yaagasu.




Xoossay shooshakko, "Neeni baadetadasa! Neeni ne uluwara goosnettana; ne de7o laytha ubban baana laaccana. Ne gidдонinne macase gidдон morketethi medhdhana; ne sheeshaa gidдонinne I sheeshaa gidдон ixotethi wothana. I ne huuphiya qoxxana, nekka iya ginddiya dukkana" yaagis.



Xoossay maccasekko, "Neeni waaye iqethan na7a yelana. Neeni ne azinaara daanaw amottana; I nena haarana" yaagis.



Xoossay Addaamekko, "Neeni ne machiw si7ida taw kiitettona ixxada. Biittay ne gaason baadetidaba gido. Neeni gita daaburssan biitta oothada maana. Neeni biittafe medhdhettida gisho biittako simmana" yaagis. Addamey ba machiw de7oy de7iya asa ubbaas aayo gidiya gisho, "Hewaano" gidi sunthis. Xoossay Addamenne Hewaano mehe galbba giigisidi mayzis.



Xoossay, "Hiza asi lo77onne iita eranaw nuuppe issuwada gidis. Entti bantta kushiya yeddidi, de7o immiya mithaa ayfiyappe moona melanne merinaw de7on doona mela teqettanaw koshshees" yaagis. Hessa gisho, Xoossay Addamenne Hewaano lo77iya atakilte bessaafe kessis. Oonikka de7o immiya mitha ayfiyappe moonna mela yaa efiya ogiya naagana mela wolqqaama kiitanchota wothis.

Geeshsha Maxaafa taarikey eketiday, Medhetetha 3